

四庫全書

集部

欽定四庫全書

集部

蘇魏公文集卷三十六
至

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遂

謄錄監生臣施華

欽定四庫全書

蘇魏公文集卷三十六

宋 蘇頌 撰

外制

真宗皇帝忌日齋文

伏以仙馭竄遙禮極如存之奉殊庭薦祝歲嚴奉諱
之辰憑覺路之勝因尊孝思之遠慕恭惟真宗皇帝
丕承謨烈馴致治功作聖述明繼三五六經之美登

封降禪踵七十二君之高尊道貴德以垂休翼子謀
孫而永世今皇帝接千載之統紹五聖之基頌文祖
之清明感終憂之怵惕式虔寶所載舉梵儀諷祕密
之真文贊逍遙之邃境真宗皇帝伏願穆清凝命泰
定發祥敷聖政以日躋恢德寓之天覆然後願君臣
一體詠元首股肱之歌宗子維城固枝葉本根之庇
嘉生茂遂黎庶綏安獫狁共戢於威懷中外均蒙於
福祉

章懿皇后忌日齋文

伏以尊閼宮之祝載屬於諱辰修竺國之儀聿嚴於勝會式資冥祐仰達孝思恭惟章懿皇后德配坤元體儀宸極夙挺覩天之表早符夢日之祥愴真馭以雖遙想徽音而如在今皇帝紹隆洪緒緬慕懿慈不忘追遠之誠用謹終憂之禮博謀梵教廣植福田章懿皇后伏願安處淨方超登覺地布法雲之靈潤助皇器之置安今皇帝伏願天廣睿謨颺馳景化帝與齡而益永民歛福

以無疆然後願据鼎元臣宣泰階六符之耀維城懿戚
協本支百世之期五風十雨以順調九種百嘉之茂遂

元德皇后忌日齋文

伏以仰太姒之徽音式臨於諱日集覺皇之勝利上薦
於冥塗恭惟元德皇后道合靜專體躬柔順內茂契塗
山之範誕彌開甲觀之祥啓迪孫謀嗣隆寶構今皇
帝重明繼統下武膺期念生民尊祖之詩謹君子終憂
之禮欽崇梵教允答懿慈元德皇后伏願受記內宮超

神淨域廣一乘之妙理貽萬世之丕猷今皇帝伏願福
固岡陵壽齊箕翼大器協置安之喻彞倫臻攸叙之功
然後願元首股肱載詠康良之美百辟卿士共修屏翰
之能四時宣玉燭之和萬物遂崇丘之盛

翼祖皇帝忌日齋文

伏以王業所基式仰貽謀之盛梵宮斯闢聿嚴追遠之
誠屬諱日之載臨仗福田而是薦伏惟翼祖簡恭皇帝
穹旻毓粹淳耀發祥同太王之好仁周由是盛類懿祖

之潛德唐以之興今皇帝繼體承乾因心篤孝奉廟祧
之薦靡懈於時思崇佛事之嚴上資於冥報翼祖皇帝
伏願一乘悟理萬行超緣逍遙因地之尊福祐皇圖之
永今皇帝伏願聖謨廣運神化博施並日月之代明與
乾坤而齊泰然後願君臣同體夷夏宅心廟堂宣鎮靜
之風藩屏協維持之固雨暘寒燠感順序於天時黍稷
稻粱獲登成於歲事

宣祖皇帝忌日齋文

伏以基命有開逖仰貽謀之盛等慈無上式崇追遠之
嚴記撤樂之曩辰切因心之永慕伏惟宣祖皇帝靜淵
載德濬發儲祥契敷教以在寬道隆商祚幽好仁而貴
恕命集周邦今皇帝纂紹丕圖大凝至治宗祏奉尊於
祖始靡懈時思仁祠崇殖於勝緣載懷終諱宣祖皇帝
伏願三明悟理十號登尊棲神極樂之方流祉無疆之
祚今皇帝伏願道超邃古化格殊邦靈臺臻偃伯之期
仙石永拂衣之劫方隅底定夷裔懷徠然後願藩屏親

賢維城而作固廟堂輔相迂衡而弗迷官師咸盡於忠
規兆庶永躋於壽域

太祖皇帝忌日齋文

伏以真聖膺期肇鴻圖於億世嗣皇尊祖薦冥福於五
天薦臨稱諱之辰彌切聿追之念恭惟太祖尊號皇帝
昊穹凝命淳耀發祥剡五季之荒屯邁百王之遐武卜
年定鼎遂開周室之隆厭世乘雲俄復帝鄉之邈今皇
帝大明紹統至治格天當明發之有懷記登遐之遠日

漢家原廟世逾久而禮逾嚴竺典上乘歲有崇而月有薦太祖皇帝伏願棲神淨土授記迦文證大覺於密圓祐丕基於永久今皇帝伏願萬神薦祉百順儲休橐革於靈臺納編齊於壽域百嘉茂遂協春秋之有年四表輯寧類成康之美俗宗邸保磐維之固台司宣燮贊之謨周行共效於忠純率土永臻於泰定

懿德皇后忌日齋文

伏以贊塗山之內德遠記於諱辰開摩竭之道場盛陳

於佛事式遵舊典祇達上誠恭惟懿德皇后毓粹倪天
體尊儷極宣六宮之陰教睿問無窮侑七廟之神班音
儀如在今皇帝繼承邦統緬慕祖慈雖孝切時思靡懈
春秋之祀而禮嚴終忌用修香火之緣庶憑無上之功
克助往生之願懿德皇后伏願逍遙金界步武鷲峯受
密記於雙林祐丕圖於萬葉今皇帝伏願諸天降福六
氣導和邁垂衣執契之時過定鼎卜年之歷華夷砥厲
號令風行然後願長信母儀永享於璇極休明卿佐交

輸於蓋忠

孝明皇后忌日齋文

伏以閼宮尊祖懷懿範於河洲竺典崇因薦往生於淨域式臨遠諱夤舉舊章恭惟孝明皇后稟粹坤元宣風陰教茂娥莘之內德繼任姒之徽音仙馭雖遙神靈如在今皇帝紹休鴻緒緬慕先猷贊厥德之覩天記斯辰之撤樂恭憑佛寶仰助真游孝明皇后伏願證十號之明因超登覺地佑千齡之興運永固皇圖今皇帝伏願

乾健粹精天臨溥率綿區安堵若泰山之四維寶歷過
期等河沙之數量然後願維城近戚共敦信厚之風佐
鼎羣公協贊休明之治萬國效傾葵之志千官輸拱極
之心和氣充盈嘉生茂遂

太宗皇帝忌日齋文

伏以繼天開統功成早棄於人寰尊祖奉先孝治聿追
於王業式臨諱日廣植勝緣恭惟太宗皇帝躬濬哲文
明之姿撫重熙累洽之運朝玉帛於萬國異俗率懷考

聲明於百王休功莫並今皇帝不欽謨烈嗣守基圖內
奉宗祧之嚴以時孝享外崇佛寶之薦載慕神游太宗
皇帝伏願乘惠力之神通悟法緣之清淨三明四智超
覺地於如如億載萬年燕孫謀於永永今皇帝伏願道
躋治古恩浹懷生與日月而並明等椿靈而齊久皇闡
集祉宗邸延鴻台宰樞衡克協良肱之詠王畿藩屏常
臻奠枕之安茨梁之稼薦臻玉燭之時不爽

章獻皇后忌日齋文

伏以三代贊姬莘之德式仰徽音六時誦華竺之文用
資冥祐載崇嚴薦允逮諱辰伏惟章獻皇后坤德靜專
母儀慈聖佐佑仁祖深居長樂之尊配祔真庭永奉不
祧之祀今皇帝繩祖之武念親以誠當撤樂以永懷望
禕衣之益遠虔遵梵教崇勝利於無邊想望神游薦往
生於彼岸章獻皇后伏願超神淨土受記迦維斷三界
之塵遊悟一乘之妙理今皇帝伏願恢明皇度翕受純
禧壽量等妙高之山福聚比甚深之海兩宮集祉前曜

宣明然後願宗室五侯盛休風於麟趾台司百辟增重
望於鸞庭四方同元鼎之安萬物遂崇丘之盛

章獻皇后忌日齋文

伏以贊內德於塗山有懷曾世啟真文於靈笈式助飈
遊甫臨奉諱之辰敷贊往生之願恭惟章獻皇后軒文
毓粹坤載儲靈布陰教於六宮義尊配極盛母儀於四
海道載臨朝今皇帝祇紹寶圖緬懷懿範嚴闕宮之睟
穆深切孝思闢琳館之沈深載嚴法會章獻皇后伏願

霓霄躡景瑤闕棲神契至道於逍遙佑丕基於綿永今
皇帝伏願功符不宰治協無為欽承衆妙之宗順撫重
雍之運皇居宸極永同不拔之基慶壽寶慈共享無疆
之福宗子惇和于藩屏宰司鎮靜于廟堂夷裔懷柔烝
黔富庶

仁宗皇帝忌日齋文

伏以仙馭升遐步霄虛而不返殊庭駐景肖廟貌以如
存載臨撤樂之辰想望登真之路庶憑道妙上助神游

恭惟仁宗皇帝人文化成神武不殺宅位四紀猷謨躋
聖域之優升遐七年華裔極軒臺之慕今皇帝酌先祖
之道廣文王之聲孝切因心匪懈廟祧之享禮遵奉諱
載陳科錄之儀諷三洞之秘文資九清之遐駕仁宗皇
帝伏願棲神碧落飛步黃庭悟道之真得元珠於罔象
作邦之祚齊大劫於延康今皇帝伏願並日照臨與天
長久誕布不言之教恢隆無上之宗長信母儀常遂承
顏之樂宗英宰弼咸宣衛社之忠百官承式以一心六

合同風而內嚮

仁宗皇帝忌日齋文

伏以奉衣冠於原廟追述先猷諷經唄於仁祠式資冥祐諱辰斯逮勝利是崇恭惟仁宗皇帝睿智如神聰明冠古四紀盛仁風之布萬邦從壽域之躋厭世乘雲俄復帝鄉之遠配天作主聿嚴郊祀之尊今皇帝下武膺期重明繼照念太平守成之訓寔本貽謨遵忌日不樂之文盛陳法供仁宗皇帝伏願三明證理十號登尊度

沙界之群生護金輪之景祚今皇帝伏願道齊佛佛功
濟元元廣開西竺之虔門增固南椿之壽紀兩宮聖善
永慶於承顏百世本支爰膺於錫羨宗邸各安於惇睦
公台咸副於倚毗百穀順成三邊底定

明德皇后忌日齋文

伏以如幄流芳仰徽音而益遠梵宮植福資冥祐以無
邊爰舉舊章式嚴諱日恭惟明德皇后稟靈清漢棲景
皇闡贊內德之肅雍丕昭懿範廣孫謀之燕翼垂祐鴻

基今皇帝欽紹寶圖追述祖武孝切因心之感匪懈時
思禮遵撤樂之文載崇佛事明德皇后伏願超登十地
安住三乘悟法忍於無生助邦風於長懋今皇帝伏願
光文協帝盛業際天增千億之長齡保丕平之景祚兩
宮慈養永對承顏之歡五等宗侯更重維城之固承弼
副具瞻之望宮師堅盡瘁之誠九鼎采安百嘉茂遂

開啟同天節道場齋文

伏以千齡誕聖甫臨維夏之期百辟傾心共致後天之

祝卽祇園而布懇贊寶祚以延洪伏惟皇帝陛下繼體承乾持盈保國光昭五聖之緒茂建九疇之中相公參政秉國之均事君以道罄純臣之一德頌天子之萬年皇帝陛下伏願道格皇穹德侔司契躋唐虞極治之際過宣高享御之期相公參政伏願彞鼎銘勲椿靈薦壽荃宰永符於重寄康良載協於賡歌然後願軒冕衆賢同底贊襄之績藩宣群后共成夾輔之勲編齊臻富庶之期夷裔戢威懷之德

祭文

中書祭秦國大長公主文

帝唐之盛女曰娥英爰周致隆王姬振聲粵我仁祖駕
唐軼周溫溫太主寔茂芳猷惟主之賢慈和柔惠其質
蘭薰其儀玉粹結愛帝后孝恭天至執勤傳保言容日
備往擇好逮屬在外門恩隆下嫁禮視維藩爰開湯沐
爵命再頒成此肅雍車服以蕃寵冠三朝義先近戚帝
錫之祉光華赫奕云何不淑邁疾斯亟捨此明辰歸於

厚宥常念仁姑曾不永年悲興長樂痛軫慈顏奠喪製
服追愴親賢邇臣督葬卜吉新阡肅肅帷褫嚴嚴鹵簿
神閨啟銘靡旌卽路絜此餼羞奠以清湑菲誠是將明
靈斯佇尚享

中書祭唐尚書文

致祭於故叅知政事贈兵部尚書唐公之靈惟公稟江
漢之粹靈挺荆衡之材秀來儀上國自致青雲在仁宗
朝以峻節清規擢踐臺閣登侍禁嚴在英宗朝以重名

遠畧入掌風憲出臨藩州今天子綜覈功名寤寐賢俊
召公方面委職計庭不及一時叅輔大政惟其彌綸之
緼施設之宜資適逢時而命屈於中壽才可經遠而道
卷於半塗公之云亡國之不幸茲所以嘗僚之列周行
之間靡不茹痛於哲人而齎咨於遺直也命龜協吉輶
車云西酌以清觴愴乎永訣尚享

表

賀日蝕會有陰雲遮蔽

臣某等言伏覩司天臺奏今月一日辰巳間太陽當虧有陰雲遮蔽者日月之行適合二交之次天人之際聿彰丕應之符當見象之蔽虧睹層雲之掩靄躔離所距不過中星之分漏刻未移已消內壤之異誠由德感事異常均臣某等誠欣誠喜頓首頓首伏惟皇帝陛下保佑邦圖祇畏天戒考日官之推步驗晷景之晦明前敕攸司遵行舊典感不踰於旋日陰沴潛消善乃格於降祥冲和可召臣等叨聯近路親矚殊休同詠歎於聖功

積欣歡於悃臆伏請宣付史館以彰盛德臣等無任

上尊號第一表

臣等伏聞道被四表必享尊高之美名恩浹群生當膺
億兆之大奉蓋君人者以含容為廣而報上者以愛戴
為公是故延鴻軒昊之稱睿哲聖神之號或以配其盛
德或以昭其成功若古皇王以來無廢厥命惟我祖宗
之世咸備斯文屬逢泰定之期輒效推崇之舉臣等誠
懇誠切頓首頓首伏惟皇帝陛下天錫勇智日新健剛

紹五聖之重光不忘於欽翼當百年之盛際益戒於盈
成若乃法乾之始亨則物蒙其美利象春之布德則時
播於中和建號紀年協廣帝安人之訓推天校厯謹求
端頒治之程斯可謂之奉元矣萬幾聽斷之間羣臣進
對之際非典訓之言不道惟治亂之本是咨講論六藝
之文則日昃而靡懈收合諸儒之議則躬行而弗違斯
可謂之憲道矣制宏遠之規撫孚溫雅之號令經緯禮
律而大備罔羅幽逸而畢升正朝位之儀則九賓以肅

躬郊丘之報則羣祀用修此合乎周人之文也愴威四方矯正羣枉奮神靈之獨斷成天德之高明問罪西垂不勞兵師而狡羌請吏懷徠絕域靡待文告而屬國內朝此類乎成湯之武也發教庾之粟以息轉徙之艱罷河防之役以寬追胥之急訪高年之人而賜以爵命績功臣之世而授以秩官雖唐堯之仁無以過也三年無改於先帝之道一日不廢乎兩宮之朝封爵以厚乎藝祖之昭收族以正乎宗室之叙雖大舜之孝有若是乎

所謂治定功成冠百王而稱首備道全美包四大而獨
高方斯之時有生之類靡不游泳於德澤鼓舞於祥風
咸欲上薦鴻名表章茂烈萬衆俯伏而勤請者數四陛
下退託而不從者彌年且人謀不可以固違而國典不
可以久闕敢緣前議率籲羣情臣等不勝大願謹昧死
請上尊號曰奉元憲道文武仁孝皇帝伏惟陛下體至
公之行察輿望之久不以道大而薄其禮不以謙尊而
抑於人濬發德音誕受徽冊如此則羣公庶尹得盡傾

輸之誠百姓黎元共安歸往之義臣等無任

同天節謝錫慶院齋筵

竊以瑤光貫斗欣逢震育之辰湛露晞陽載荷燕私之
禮旅星肴之豐旨醴玉醴之清醇百辟盈庭共識惠慈
之渥萬年獻壽咸傾愛戴之誠伏惟皇帝陛下德威離
明道躋乾健一中和於夷夏躬勤儉於邦家臨御再晷
動植畢沾於仁澤誕彌嘉節邇遐悉播於頌聲臣等生
偶盛期職塵近任祝聖方輸於懇款推恩遽被於眷懷

詠太平既醉之詩已陶至化念王臣匪躬之故益厲丹
誠臣無任

笏記

里社告符慶協千齡之運法筵集祉仰延萬壽之期薦
沐燕慈俯均飫賜臣等叨陪近輔欣邁休辰上蒙恩禮
之隆益負素餐之愧

賀皇帝為太皇太后入慶壽宮

臣某等云伏覩宣示今月二十七日太皇太后入慶壽

宮者坤靈寶勢肇新壯宇之樞帝室皇居克正母儀之位揭鴻名於永久彰懿範於多方孝治所先人倫胥慶臣某等誠歡誠抃頓首頓首伏惟皇帝陛下體乾宅粹順帝頒常承顏日逮於兩宮廣愛風行於四海間徇輔臣之請聿崇長信之居鐘鼓考成並擁神明之祐膳羞就養不違晨夕之歡極大孝尊親之嚴兼聖人能事之美臣等叨聯近任獲邁盛期宮寢攸寧茲享無疆之祉岡陵比壽敢傾善祝之誠臣等無任

賀太皇太后入慶壽宮

皇居華奩式奉於母儀坤德靜安載彰於孝治鴻名昭
示列辟胥歡臣某等中賀伏惟太皇太后殿下德配姜
任道超陰馬當仁皇臨御之久輔佐益勤逮英廟繼承
之初保佑罔至屬重明之撫運闢長信之新宮棟宇攸
寧永享神靈之貺晨昏就養不違恭愛之心足以廣風
教於多方厚人倫於庶俗臣等並叨輔政側聽成儀竊
欣即寢之安共罄永年之祝臣等無任

賀皇帝為皇太后入寶慈宮

臣某言准閣門告報今月十一日皇太后遷入寶慈宮者揆日作宮肇新於帝制承顏展慶欽奉於母儀御華寢以即安揭崇名而永大仰符吉卜人極歡心臣某誠欣誠抃頓首頓首伏惟皇帝陛下躬濬哲之資保盈成之戒內奉長樂靡怠晨昏之恭旁據坤靈克成棟宇之壯雖斯干考室之盛南陔戒養之勤未若聖心克諧懿德盡人子事親之義見明王孝治之風臣等叨贊化鈞

側聞徽典幸慶千齡之遇徒傾萬壽之祈臣等無任

賀太皇太后為皇太后入寶慈宮

臣某等言准閣門告報今月十一日皇太后遷入寶慈宮者大明崇構瞻帝宇之邃深長樂新宮慶母儀之尊奉考禮經之成寢本孝治之因親凡在覆臨率同愛戴臣某等誠欣誠忭頓首頓首伏惟太皇太后殿下道先慈儉躬執謙虛復子辟於前朝詒孫謀於嗣聖太微紫極宸居上法於二垣東序西廂就養並行於兩殿實

千齡之盛事協四海之歡心臣等輔政備員逢辰至幸
九重集慶側聽於臚音萬壽祝延載傾於丹悃臣等無
任

賀皇太后入寶慈宮

臣某等言准閣門告報今月十一日皇太后遷入寶慈
宮者母儀四海載崇盛麗之居孝治萬邦思盡愛恭之
意方即安於寢宇慰奉養於晨昏揭徽稱以惟新率羣
倫而胥抃臣某等誠欣誠喜頓首頓首伏惟皇太后殿

下躬涵淑聖道協靜專先朝推輔佐之勤嗣聖荷誕生
之慶太微帝宇雖同環極之軒房長樂后宮抑有尊親
之故事肇新規而取壯案盛禮以考成坤德攸寧皇圖
永固臣等逢辰盛際備位近司仰三宮正位之辰見萬
乘承顏之美徒傾至悃永贊熙辰臣等無任

謝重陽宴表

清霜貫序慶萬寶之登成湛露推慈錫千鍾之燕飲嘉
會掩龍山之集近班諧鳧藻之娛臣中謝伏惟皇帝陛

下體具乾剛仁深天覆察璿璣之運動調玉燭之均和
節戒九陽有登臨之故事恩均百辟盛愷樂之多儀臣
等叨備政司預沾飫賜簪纓就列獲游漢籞之嚴樽俎
交歡如醉楚醪之享仰承洪造彌激丹誠臣等無任

蘇魏公文集卷三十六

欽定四庫全書

蘇魏公文集卷三十七

宋 蘇頌 撰

表

謝改祠部員外郎

臣某言今日日進奏院遞到官告勅牒各一道伏蒙聖恩特授臣尚書祠部員外郎依前充集賢校理散官勲封賜如故已即時祇受訖者南宮地要左省資清由考

課而叙遷顧濫官而有愧寵光所被震惕兼常臣某中
謝伏念臣本乏異能惟希樸學始以文詞而得仕寢階
儒雅之並游校石室之書未終編次綴金閨之籍久汚
周行間叨出守之行頗遂自營之便洊更內外靡効涓
塵徒殫累久之勤甫應攸司之比曲推天獎擢寘郎曹
仍因詞館之舊規得躡冰廳之近署仰承渥命實為非
次之榮俯揆庸材奚稱清班之選此蓋伏遇尊號皇帝
陛下推至公之厚德錄羣下之小勞發絲綸之言出而

彌大霈雨露之澤惠以無私曾是遠孤均蒙況施臣敢
不祇循謨訓益厲公忠州郡之政雖未優敢忘盡力朝
廷之恩得其報豈憚捐軀瞻望闕庭臣無任

謝改度支貲外郎

臣某言進奏院遞到告勅各一道伏蒙聖慈特授臣尚
書度支貲外郎依前充集賢校理散官勲封如故臣已
即時捧受訖者大明升照幽遐皆矚於輝光麗澤周流
品物咸均於膏潤顧惟州郡之列外隔雲天之瞻例沐

朝禧叙陞官次對南宮之清選荷中詔之優除拜賜以
還措顏無所臣某中謝伏念臣僻儒陋學哀緒孤生始
充賦於有司遂策名於乙等脫巾從仕寢牽俗吏之為
給札試言俄玷文林之選既效刊讎之業復參典領之
司贊緝禮於奉常預紬書於天祿棲遲數職涉歷八暮
愧非博洽之能靡有發明之效每循涯分敢計淹通向
以私便而自陳蒙假近封而試守出頒條詔姑度時之
所宜上體朝廷惟恤民之是務徒內殫於心慮曾未效

於毫分昨者伏遇皇帝陛下纂紹丕圖發揮鴻業遵累
朝之成憲推大賚之殊私施命以誥四方仁無異遠猶
天之運一氣物悉由庚而臣恪守藩條親逢邦慶方切
傾陽之志遽叨增秩之文左省通班猥被殊常之擢下
邦冗守益知重外之榮揆省非才忤慙厚渥雖官仍古
號無職業之當遷而恩出宸慈顧寵名之難稱敢不恭
於授命勤以首公勉修政令之宜冀有消塵之補少收
薄最上報盛時臣無任

淮南轉運使謝上

臣某言臣昨自三司度支判官伏奉勅旨蒙恩擢充淮南諸州水陸計度轉運使兼本路勸農使臣即以七月十五日到本任交割職事管勾訖者贊畫甘泉久玷三臺之末觀風淮甸驟陞數使之榮朝寄非輕地望兼重愧非才選靡稱厥官姑謹詔期趣行所部寵靈所被畏惕非常臣某中謝竊以州郡備官所以分釐於民務朝廷遣使所以宣布於主恩付一道之事權用六條而舉

察賦輿出內俾以均輸吏治否臧責之薦黜自非綿更
於事任渠能振肅於治綱若臣者才不足以適時慮不
足以經遠偶緣資級之例得從選用之階始自書坊出
分使竹帛從褰服入佐計籌粗收歲月之勞蔑著毫分
之效豈謂伏遇皇帝陛下察庶工之任事矜久職之良
勤拔於省僚授以利柄矧惟淮海之部寔搃東南之衝
昔號輿區今逢樂歲五稼盈疇而遂茂四人勤力以厚
生料乎漕運之程無煩趣辦之急惟當敷宣惠澤通究

物情編齊之利病可更必求其本刑政之重輕或失當適其中止期嘉靖少稱掄擇若乃事體貌以為風采盡銖兩以歛民財顧在懦愚誠多閤畧重念上慈天覆聖治日新官無內外之殊事悉憂勤之繫昨臣受任之始獲面於清光陛下臨遣之言曲加於勉諭自省最為於踈遠何圖亦記於淵衷豈非以委任之優故特示拊循之厚雖乾坤平施非報謝之可言而犬馬微生第勤勞而思奮倘馳驅之有用期終始以無渝瞻望闕庭臣無

任

潁州謝上

臣某言昨奉勅差知潁州軍州即以三月五日到本任
赴上訖者初蒙補郡遽忝近封內省非才奚堪優命始
受虔君之署即頒問事之條思職當優以榮為懼臣某
中謝伏念臣顓侗所稟識蘊無竒承家學之緒餘冒詞
科之等次獲參仕綴甫徂吏文以小材積日之勞例遷
散秩預尚方給筆之召遂齒清流暨入直於文林亦更

塵於事局贊奉常之典禮講練非精定廣內之圖書繙
酬未究竊自營於私計因上丐於外官國體務寬詔恩
垂可折半符而付畀假便地以優容恭惟至治之辰方
重長人之吏惟良而與共此深軫清衷選賢而欲安之
訖臻善化矧汝陽之故壤控淮服之上游民承艱食之
餘朝舉救飢之政向非庶平之素著豈稱選俞顧慙空
薄之無聞謬膺寵寄此蓋伏遇尊號皇帝陛下高明委
鑒造化財成任官惟賢非有內外之異授人以政將觀

治理之能弗間孤愚均令任使臣敢不勤宣上德勞徠
斯民夙夜罄於一心躬親輯於庶務簿書細故必嚴期
會之程獄訟羣情當適重輕之典倘收薄最是答鴻私
瞻望闕庭臣無任

謝弟枕授秘閣校理

臣某言臣伏見今月二十三日詔勅蒙恩以臣弟尚書
虞部員外郎枕守本官充秘閣校理者振滯之舉實曠
世之罕逢遭時之榮顧一門而特盛父子相望於近序

弟兄繼踵於鴻都豈伊遠孤邁此殊遇臣某中謝伏以
校文中秘儒者美官預臺閣之漸階以鉛槧為職業朝
廷育材之地禮待之甚隆公卿薦士之科推擇之尤遴
載念臣之末緒稅也無聞姑用先臣之素資得通閨籍
而叙進粗承家學未策世科會英皇帝閔詞館之寢微
命政事府論士林之逸滯詎期柄弼輒以名聞時方困
簿領之迷疇敢覬圖書之選重明繼統前詔遂行收從
甸服之還許試複門之禁推恩特異予職過優以平進

常調之流陞名於天祿非大雅博達之士筵跡於俊躔
豈惟叔氏之冒塵抑亦臣愚之厚幸此蓋伏遇皇帝陛下
下廣人文而致治遵聖考之成模搜揚巖穴之遺間用
衣冠之族布春澤之潤自葉以流根舉泰陽之征拔茅
而連茹使臣同氣之賤繼忝登瀛之游載世光華多士
稱詠臣敢不念教忠之訓戒異物之遷一心首公百為
盡節雖簡編之任未能酬天地之恩而手足相維庶可
展股肱之力用茲勉勵少答生成臣無任

謝知制誥

臣某言伏奉制命蒙恩特授依前守尚書工部郎中知制誥告謝日仍面賜金紫章服者非常之命忽降於中宸遠至之人驟陞於邇綴矧演綸之職峻顧發藻之才微冒服寵靈深懷愧惕臣某中謝伏以王言所記寶訓具存欽明濬哲之君有二典以載其道仁義公恕之主因七制以見其心蓋君臣之吁俞或號令之宣布非言無以盡戒敕之意非文無以揚鼓舞之功下更十代之

紛紜皆備一朝之制作其事則雅頌之各異其辭則體
要以為先惟是代言之司實專起草之事相沿往範罟
號要塗地親法從之聯官列近司之屬分曹領乎六押
時預邇謀判事謂之五花間參疑議豈徒取揮翰之士
蓋亦藉幹時之良用人其難歷古所共肆我朝之致治
遭列聖之右文世有常楊之倫入居詔誥之任由是百
年之盛德遠追三代之高風興闡大猷雖本聖朝之獨
運潤色鴻業亦資儒雅之敷揚向非博達之流加有精

通之識高文大冊可以發揮治功忠言嘉謀可以裨助
聽斷則無以茂膺華選克繼前修如臣者哀緒微生寡
聞淺識少而好學竊慕聖賢之所存勞而無功遂以顛
愚而自守寅緣科級涉歷士階始課簿書之勤稍遷京
寺再叨翰墨之薦獲玷詞林亦嘗典禮曲臺校文中秘
假麾賴尾案治囊畿贊大農之計籌預商利筦持使者
之華節薦領事權奔馳未效於小勤趨走遽蒙於迅召
超從冗外入奉清閒對仗分班幸識侍臣之貴研螭記

事多慙良史之能每懷踰分之憂姑守宿官之願不圖
進拔特出睿衷命試可於公槐遂躡登於星掖拜恩之
始亟瞻省戶之光占謝之辰仍被服章之賜不日改士
倫之觀在臣為曠世之榮重念亡父先臣被遇仁宗嘗
登西閣歲月裁踰於二紀寵光復逮於孤臣識謝文饒
豈練朝廷之典故才非百藥猥居父子之世官徒驚後
拜之優莫繼先芬之善感極而涕隨言發愧深而汗浹
顏間將何以荷累聖之深恩對一門之盛事逢辰至幸

撫已愈輕此蓋伏遇皇帝陛下揔攬權綱慎徽典則謂祖宗之制皆可舉而行惟臺閣之模以得人為盛因掄才於珥筆使贊命於出方靡由左右之容俯收積累之效擢之清禁寘彼通班臣敢不厲志冰淵潛精簡冊早暮百思於事守終始一志於公忠裁渙號之文慎於返汗念謇臣之節期以匪躬冀成消露之勞少答高旻之施臣無任

婺州謝上

臣某言昨奉勅差知婺州軍州事已於二月二十四日到任訖者濯已然之深谷推不次之優恩析以省符委之州政彷徨去國徒結戀於軒墀黽勉之官良有愧於民吏臣某中謝伏念臣賦材不厚學道甚迂偶肩羣俊之彙征薦荷三朝之樂育典藩將漕校治迹以無稱載筆演綸點榮塗而有日向緣職守輒議詔除蓋狃習於故常致久格於成命稽違有禁合寘於嚴科在宥推仁止鑄於近籍恭趨朝請甫越歲華屬均宗祀之釐遂假

東陽之守川塗累月間關百憂敢辭遠道之勤實懼嚴
程之過適臨治所載惕愚衷祇服寵光深深感涕此蓋
伏遇皇帝陛下堯仁天廣周澤海流躬摠攬於萬機思
慎用於八柄以庸制祿效雖薄而不遺觀過知仁情非
故而或捨顧臣無狀受賜實多始收擢於遠孤終含容
於狂妄率由洪造曲示矜全臣敢不祇省前愆勉思後
效奉六條之戒敕一稟新書使七邑之黎萌咸知上意
倘涓埃之可集在夷險而不渝

亳州謝上

臣某言昨知婺州伏奉勅命就差知亳州已於三月二十七日到任訖者山城遠守方待罪以靡遑圻輔名封忽蒙恩而內徙出南陬之卑陋從寰內之便安涖職之初省躬無措臣某中謝伏念臣器非閎達性本顓侗蚤仕周行寢塵榮仕先朝寘之詞館粗歷中外之煩陛下擢之掖垣久侍清閒之燕然以才微寵過效薄釁深果積愆尤上繫含貸還省曹之舊秩日奉外朝剖使竹之

新符出為方郡甫周歲琯未著事勞不圖易地之優遂
竊維藩之重矧臨渴之輿壤連象日之中畿賦役平均
被周官輕近之惠詔條明備邁漢家畫一之規其在長
人之官足以循法而治豈茲棄置宜稱拊臨此蓋伏遇
皇帝陛下天地生成山川藏納念嘗任使猶齒錄於姓
名拔於遠孤就付畀於垣翰顧臣無狀寔惕優除惟當
上體朝廷一心政事勤訪生民之利病使知睿主之恩
仁冀桑榆之可收誓堅晚節倘塵露之有補豈吝微軀

謝集賢院學士

臣某言一去禁嚴再逢郊霈荷言綸之優獎進書殿之
華資追訟前愆震慚新寵臣某中謝伏念臣瑣材近器
淺識寡聞偶由鉛槧之勞稍躡閨臺之序履歷中外不
離刀筆刑名之間拔擢顯華遂階言語侍從之列每念
逢辰之幸會常期盡瘁以匪躬當官而行竊效古人之
守不學無術尚拘流俗之為果自觸於嚴科坐鑄除於
近籍奉朝逾歲姑勤夙退之恭假守二藩已就外遷之

例不圖名姓尚簡續旒未終更戍之期忽被召環之命
入趨峽闕賜對便庭親承德音俯慰沉跡寒蟲蟄戶聞
震競而知出幽潛宿草陳根煦春陽而復有生意俄獲
典司於武選所忻復望於清光退省已之昨非惟刻心
而自咎伏遇皇帝陛下躬圓丘之大報徧寰宇以均釐
刮垢滌瑕物沾再造之施振淹起廢人賴曲全之私夫
何釁累之餘荐沐生成之惠寘之儒職復以榮塗恭以
國家恢振治綱一新政體聲明紀律高出於百王文物

衣冠畢登於羣彥惟麗正圖書之府盛開元禮樂之司
宜得豪英為之領袖豈容叢陋遂黜品流重念臣早預
校讎殆周旋於二紀今叨選用復冠冒於諸儒雖淵衷
軫念舊之懷而有司亡辨等之比伏詳辭訓參質故常
在外館之地則為閒正學士之名則已重先朝著定或
自二府公台而踐更近歲例遷皆由兩省丞郎而兼領
陛下以臣因需恩而甄叙故許用散秩以超除惟其恩
數之優當有官儀之別亦嘗自言於公府豈敢取必於

僉諧尋拜寵嘉載懷悸懼雲霄咫尺徒堅傾藿之心堂
陛等差限隔規蒲之禁謹當祇循上賜增激丹誠惟公
家之利是思非忠義之言弗道所領簿書之餘暇重講
習於舊聞異時典故之討論冀粗知於大畧倘厚恩之
可報雖誓死以無辭臣無任

南京謝上

臣某言昨奉勅命差知應天府兼南京留守司已於今
月十一日到任訖者象日建畿地本興王之重刻符為

瑞寄分別鑰之優被旨趣行馳郵即路初泣虔君之表
愈懷存闕之誠臣某中謝伏念臣平進孤生腐儒曲學
荷累朝之樂育得廁羣英蒙陛下之采收擢登近列間
以敗官而罹責久從散秩以偷安去國三年屢涉江湖
之險長民二郡未施犬馬之勞俄賜覲於天臺繼備員
於武選再原郊需復寘書林直廬方識於故棲近輔遽
叨於外補保釐東國固慙維屏之非才密邇中都茲幸
承流之易治此蓋伏遇皇帝陛下勛高上世澤浸多方

謂王政之所施必由近始顧吏能之可任不以遐遺豈
圖蹇躓之餘辱預旬圻之選重念冒恩之優異初蘄叙
懇於清閒屬迫官期特蠲陞對不得一瞻法座少侍威
顏口陳刑政之宜面稟聖神之訓望高門之地詎惟飛
驚於精魂頒明詔之恩敢不勉勤於夙夜誓竭始終之
節少酬覆露之仁臣無任

蘇魏公文集卷三十七

欽定四庫全書

蘇魏公文集卷三十八

宋 蘇頌 撰

表

杭州謝上

臣某言昨奉勅差知杭州軍州事充兩浙西路兵馬鈐
轄已於四月初四日到任禮上訖者東南方面地實據
於上游左右省符詔俾分於半竹顧乏幹時之譽謬當

治劇之名涖職云初懷章有媿臣某中謝伏念臣素惟寡陋早荷甄收自觸憲章坐鑄禁籍出麾良翰已涉歷於歲時入覲嚴宸復進趨於臺閣一昨代還睢旬攝職京司日奉內庭之朝預陪近著之列會江吳之闕守方淮海之荐飢晷食宵衣上軫帝心之慮雄藩督府遽叨使節之榮奉臨遣之丁寧重憂思之惕厲兼馳川陸達除書所治之邦既見吏民布主上欲安之訓事叢有責才薄難勝常自省思敢遑寧處此蓋伏遇皇帝陛下躬

臨庶政周慮萬方每惟致治之源莫重長人之寄謂此一都之會素號要煩眷茲累久之勤因而任使臣敢不悉心竭力求瘼恤蓄以荒政之所宜為職事之先急農桑衣食勸家戶以趨時期會簿書率掾丞而奉法少收州郡之課上副聖神之懷臣無任

謝同修國史

臣某言伏奉勅命差臣同修仁宗皇帝英宗皇帝正史者兩朝大典方經始於冊書太史諸僚遂擢收於疎外

祇膺明詔深負愧顏臣某中謝伏以載籍之司事言尤重非宣尼之聖莫能斷唐虞之典謨有馬遷之才然後成周漢之紀傳恭惟二聖之功烈超邁百王之規撫禮樂文章經天而緯地賢能道義華國而熙朝惟其類例之繁必假約修之善自非傑筆未易充員伏念臣薄祐孤生謏聞淺識亦嘗學於舊史敢自托於無能久習吏文寢忘緒業遠方隨牒姑安州郡之勤嚴召賜環忽被絲綸之寵俾趣馳於輶傳俄入覲於宸庭脫沉迷簿領

之曹預筆削春秋之事職非其稱恩實不貲此蓋伏遇
皇帝陛下善述先猷繼繩遐武謂祖功之與宗德照臨
四紀之餘自天聖迄於治平備該萬事之統將欲垂之
不朽是用載於信書蒐擇衆材付畀重任臣謹當溫尋
素學啟發前篇考古史之見聞助羣儒之論著片言一
字雖慙微婉之辭五志三科庶裨闕漏之目倘能卒業
無憚服勞臣無任

謝賜國史院開局銀絹

右臣伏蒙聖慈特降中使賜臣開局例物銀器五十兩
絹五十匹者史官論譏之司初塵選用內府幣餘之式
均荷恩霑對渥澤之踰涯思職憂而竚甚伏念臣粵從
藩翰召置書筵閱二聖之冊書識諸凡之摠載懷鉛舐
筆愧非叙事之才束帛兼金例拜匪頒之惠寵光所被
服用增慚此蓋伏遇皇帝陛下待遇儒臣祇嚴國典俯
記編摩之始溥推賚予之私遍及具僚不遺末至臣敢
不服勤早夜積思縑縑期少補於信書庶不孤於宸旨

謝賜筆墨紙

右臣伏蒙聖慈特賜臣開局筆共七十管墨五十挺二十餅紙共一十三軸者摩研編削濫官太史之司授簡抽毫獲識上方之品緣國書而假寵拜君賜以為榮伏念臣誦數陋儒江湖遠守偶藉和鉛之舊擢登司籍之聯閱東觀之典墳方尋類例給尚書之筆札繼荷恩頒物皆中御之珍用非有司之稱此蓋伏遇皇帝陛下緝熙世烈載述聖謨選求叙事之良特記開編之始輟象

管寶跗之副兼菟枝鸞素之奇三具惟精愧乏仲將之
敏手百家可法敢希班氏之立言圖報萬全誓勤一志
臣無任

謝復諫議大夫

臣某言伏奉告命復授右諫議大夫依前充集賢院學
士散官勲封如故已祇受訖者裡祀國之大事俯邁熙
成正諫朝之諍臣敢叨叙進濯僭狂之深咎還禁近之
通班榮渥所臨愧顏交集臣其中謝伏念臣本非遠器

誤被上知無潤色之才濫司言綍有迂踈之累自絀刑
章流離外遷奔馳末路望之之試三輔日懼有聞中山
之責九年敢興滯念間起江湖之守召參筆削之司入
覲天光獲觀國典屬備輶軒之使方走窮荒荐逢泰時
之祠阻陪盛禮何言罪戾再預甄收執簡書林未責編
摩之效登坡掖省復塵清要之途內顧哀遲難勝寵拔
此蓋伏遇皇帝陛下體乾之粹報本於郊不專享於福
釐遂溥行於渙號振滯起廢推惻怛於聖衷量能授官

假名器於最質載念孤愚之蔽擢從棄置之餘肆赦胥
灾思所加者非一從事盡瘁義深切於在三更當追省
前非往圖後效職雖專於鉛槧無敢越思力可效於股
肱猶期自奮益堅晚節少答鴻私臣無任

濠州謝上

臣某言伏奉告命降授秘書監依前充集賢院學士知
濠州軍州事已於今日到任禮上訖者治劇政乖坐
絀有司之議免官責薄特寬投裔之誅獲領左符出居

善地彷徨去國但追省於前非怵惕臨州固不遑於寧
處臣某中謝伏念臣昨由藩守入覲宸嚴每惟罪戾之
餘絕覲光華之望不圖寒迹尚記清衷繙二帝之經擢
參於史職宣四方之命備遣於使行俄會京尹之缺負
首荷帝俞之超用選掄誤及秋毫皆出於上恩蹇薄所
鍾弱質奚勝於重寄徒夙宵而盡瘁顧塵露以無裨加
以智有瞽盲識無遠大事既失於不斷慮又闕於關防
內史宜彈壓於豪強而臣縱舍有罪長官當督察於僚

屬而臣聽任匪謀累速人言上煩詔鞠獄辭既具國憲
寧逃豈謂伏遇皇帝陛下恢天地之蓋容廣山川之藏
納念嘗更於任使俯矜貸於庸昏削籍近班猶竊蘭臺
之舊秩假麾外服仍分淮浦之近封飲食足以奉偏親
之旨甘俸祿足以賙敝族於溫飽豈伊黜謫遂此便安
實荷賜於君親更腆顏於民吏敢不刺心匪懈盡節不
渝雖股肱之力已衰無復期於遠到而朝廷之士貴治
忍自棄於末年誓勤宣布之謨仰答生成之造感深涕

隕言切魂飛臣無任

謝男駟賜進士出身

臣某言進奏院報今日日放進士榜男駟賜出身者計偕羣彥並膺親策之榮勲廕晚生誤竊世科之寵方主臣之負罪邁孺子之逢辰報自臚傳慶叢私室臣某中謝伏以陛下發德音下明詔以求直言有司進真賢舉實廉以奉大對革曩歲詞章之舊擢知經通博之才詢事考言既以觀其術畧因能任職又將究其施為蓋擇

之而惟艱加試之於已效得人之盛如古所稱其在朝廷彬彬多文學之士見於事業凜凜幾德誼之風自非挾經世之謀何以副揚廷之選伏念臣承家有祿教子無功本惟樸學之傳妄廁諸生之列適會詔新於科制因令時習於師言居處園橋之門寢聞講議誦吟裴氏之地竊服儒名濫隨賢書偶預奏籍方時俊猷明之際難銜淺聞乘春霆振滯之辰遂叨賜第伏况臣一門在仕三世決科逮於羣從之間繼有策名之美斯亦聖代

衣冠之榮觀不勝遠方父子之遭逢聞命兢惶舉宗榮懼此蓋伏遇皇帝陛下表章六學損益百王收攬四方之豪傑聞三道之要澤施無外允臻至治之期士生此時固有非常之遇何茲賤息輒冒寵光雖無籛金遺子之能而有桂林衣綵之喜但慙寡陋仰玷明揚臣謹當飭厲其衷庶幾於道教之吏事則法令之文可師繩以古人則忠孝之言具在倘毫分之可報雖糜粉以無辭臣無任

滄州謝上

臣某言昨奉勅差知滄州軍州事已於正月二十六日到任禮上訖者滄海奧區朔陸近塞異時禦侮本求將帥之才聖旦撫封參用文儒之士猥緣資籍得綰印章涖止翰垣屹然丘乘之衆周視城塹隱若金湯之堅夫何遠孤當是優寄濫官有覲懷懼兼常臣某中謝伏念臣稟賦拙艱操修昧陋早荷聖神之眷擢躋禁近之聯出屏藩宣入領臺閣日殫千慮識暗乃涉於迂疎每歷

一官寵過輒成於齟齬再干吏議動絀刑書罪大責輕
固常蒙於天幸恩深報寡寢已迫於年衰尚塵職秩之
榮坐貪祿食之厚姑安散地更省前非豈謂伏蒙皇帝
陛下德務在寬仁不遺舊運乾坤之造震發於枯茲委
日月之明照臨於幽鄙盪滌瑕垢歛收棄遺初析盟津
之符既容自免重假浮瀕之節復出殊私逮於臨遣之
辰賜以清閒之對謂臣之數竒多難特軫淵衷勉臣以
直道自明屢形天語重念悔尤之久積親承訓敕之丁

寧豈止鞭策於疲駑欲圖後效固將灰粉於肌骨庸副
上知遂奔走以之官期夙宵而盡瘁矧惟此郡遠控殊
方久沐承平之風號為敦朴之俗吏謹繩墨民安里閭
外則邊候無聲內則河防有備竊居守長何所設施謹
當督責掾僚講修農戰旁宣主澤冀編齊皆一於中和
外振國威使夷落咸知於畏愛尚賴仁天之覆護少收
治課之毫分仰答生成采堅亮節臣無任

滄州謝傳宣撫問

右臣今日某官到州伏蒙聖慈傳宣撫問者邊城遠
守帳隔越於堯庭使駟載馳荷拊循於漢詔眷諸曹之
僚掾逮連壘之兵師咸聽敷言交深舞抃伏惟皇帝陛
下至仁丕冒盛德輝光獫狁戎悚戢於威懷郡國虔遵於
法令因皇華之上計曲賜周爰降清問以下臨不忘勤
恤仰天慈之寵被動民聽以欣榮臣叨假藩符坐縻塞
廩戎亭偃革無施橫草之勞魏闕存心但極傾葵之志
益殫瘁節上答隆恩臣無任

謝復太中大夫

臣某言伏蒙告命特授太中大夫依前充集賢院學士
差遣散官封賜如故即時祇受訖者觸嚴科而去位歲
歷三周扳常憲以原官秩增四等省讐尤於既往荷渥
澤以朶優內積兢慙莫遑寧處臣某中謝伏念臣性鍾
樸鈍時邁亨嘉藉文史之久資被帝俞之誤獎入持簪
橐兩綴從官之聯出綰綬章嘗更尹正之任寵踰其量
悔積於躬衆毀所歸誠以處下流之故三已無愠但慙

孤上聖之知一昨滄海賜環中銓弄印遠臣去國敢言
歸覲之期內史贊方中格除書之目仰煩全度曲示棄
瑕仍委典章之司俾預討論之末屬久從於吏役加寢
迫於衰年既貽嘖言固絕榮望豈謂清衷垂憫公議不
遺書未畢於汗青命再頒於言綍惟制祿貴階之品視
通閨近著之榮匪用次遷悉還舊貫自卑而叙上事固
異於常倫若沒而復浮恩實均於再造此蓋伏遇皇帝
陛下以湯仁御衆以周典平刑溫嚴如寒暑之時進退

靡膝淵之異式序儒行有議郎大夫之名振拔滯淹忘
一眚小疵之累顧臣愚分所蒙實多敢不百慮在公一
心圖報修其禮義稍異匹夫之愚加以忠精冀蹈古人
之節臣無任

謝吏部侍郎

臣某言伏奉制命蒙恩特授臣通議大夫守尚書吏部
侍郎者治典一新官儀大正簡求髦彥若時訓迪之謨
振舉滯遺遂及妄庸之迹仰膺殊渥載惕丹誠臣某中

謝竊惟在昔哲王並建衆職內則三公四輔翼贊於皇
猷外則六卿百司經營於世務有道揆法守之叙無言
厯事易之非故官得其人而庶政惟和事任其責而萬
目自舉致治之極何莫由斯後王狃於因循流品從而
雜揉臺省清崇之秩或假寵以叙遷中外典領之科因
漸增於別使朱紫無辨要領莫尋垂百數年宜有不變
敝久必復聖斷惟精霈然發於德音將以覈其名實列
文階之等級所以革去虛稱據職事之劇閒所以裁為

中制稽於古則文而不僣驗於今則簡而易從炳焉三代之規撫垂為百世之典則渙號之始僉言允諧周禮太平之書方復行於聖旦尚書百官之本任尤重於選曹銓綜人流助毗風化建正置貳使率屬而有差因能任官諒非賢而罔治伏念臣早緣孤進偶擢近班荏苒歲時愧無塵露之益間關憂患寢傷齒髮之哀一昨誤被甄收預聞制作迂儒曲學何補舊儀之遺近列清曹并塵虛授之獎况具負之初備在首舉以尤艱恩以假

人用非有次勉臨所治益畏攸箴此蓋伏遇皇帝陛下
蘊天縱之多能富日新之盛德步驟堯舜庶績凝於九
工跨越漢唐新書高於六典特隆異數式序羣才振鷺
充庭既集羽儀之盛疲駑伏櫪亦參仗衛之榮誰料衰
遲適遭際會敢不率循詔旨探練故常謹司籍之所藏
急古人之先務重念邇邇之久已甘棄置之中睿明素
審其無他枯朽屢蒙於再造超官賦祿皆清衷特達之
知揣分量能實望外踰涯之幸屬限牽拘於嚴格無由

叙對於清閒感極涕零言殫喻拙姑自期於瘁盡庶不累於聖明臣無任

謝賜對衣金帶

右臣伏蒙聖慈特賜臣衣一對金腰帶一條者華省備官叨貳銓衡之政大庭賜服榮兼金艾之章祗荷寵光內深震惕伏念臣譎才無取多難甫還載荷甄陞入塵清要崇資峻職皆躡等以冒遷繁錫彛儀出特恩之優異藤衣纖麗環帶輝華分頒踰商筭之榮佩服負梁鵲

之愧官有其責固宜殫夙夜之勤服文以容敢不念忠
純之守仰酬洪造誓罄一誠臣無任

謝正議大夫

臣某言伏奉勅命以臣曾預詳定官制特授正議大夫
臣以任職無補過叨寵擢尋具狀辭免乞賜寢停蒙降
詔書所請宜不允者治典更新方正名於庶位尸臣不
職謬增秩於班資竊揣分以難安因控章而避免仰紆
詔札輒拜言綸覲面日以增慙鏤心膺而萃感臣某中

謝竊於義師黃紀治實本於建官唐典虞謨道莫先於
稽古欽惟睿聖之有作備該今昔之所宜三臺五省之
源流悉從訂正六職百工之鉅細咸有綱條煥乎一代
之憲章垂為萬世之法則取新去故事皆出於淵衷舉
要治煩功乃推於典領溥加獎錄遂逮庸虛伏念臣學
非夙成老將耄及向由簿領之任擢預討論之司議損
益之諸文則上遵於獨斷考冊書之故事則旁出於衆
僚顧臣充員迄無成效延引歲月當即罪誅豈意奉行

之初併霑優渥之澤天官小宰秩正二卿之聯文散貴
階位躡大夫之四寵靈特異捧對若驚內自省於冒塵
實夙遭於際會此蓋伏遇皇帝陛下聖由天縱性自誠
明躬萬務之幾微起百王之廢墜致治乎未亂以人而
代工謂周室之太平禮經具載嘉漢規之宏遠官簿尚
存將建極於中和首垂意於制作甫頒新令丕變周行
責實循名居官者必任以事等功第賞有勞者不遺其
能曾是瑣微荐膺殊選臣敢不恭承上意更勵末年倘

筋力之可支惟詔條之是守講朝廷之大議誠無以異
於衆人習臺閣之舊聞亦庶乎知之允蹈主恩欲報自
誓彌堅臣無任

蘇魏公文集卷三十八

欽定四庫全書

蘇魏公文集卷三十九

宋 蘇頌 撰

表

謝光祿大夫

臣某言近者伏遇車駕臨幸新省推恩官屬尋具奏陳
辭免蒙降詔書不允伏奉告命特授臣光祿大夫依前
尚書吏部侍郎仍加上護軍進封武功郡開國侯食邑

四百戶者中臺成室紆詔蹕之天臨司列備貲奉王言之綸出叙進上階之貴且旌服采之勤不獲避辭交深惕厲臣某中謝竊以上之所行曰幸人皆被於恩私官以稱任為差吏乃知於獎勸厲更新於會府因親屈於帝尊萬乘一游愈重南宮之故事羣司百執均蒙天子之龍光顧慙充位之聯竊與錄勞之賞伏念臣材資弗茂遭遇最先出入禁闥者十有六年典領銓衡者兩登三品飛甍鳴玉濫肩簪橐之游入墨出朱每負簿書之

殿昨恭陪於法從徧觀歷於省曹中謁者之臚傳側聞
聖諭正大夫之位序遽忝平除復推郊霈之釐賜轉王
功之等進封侯社衍賦戶田名數併增雖舉汎遷之例
階勲並進實為非次之榮況臣久荷聖知寢蠲往咎超
資匪一寓祿已高惟今甄擢之優迥越輩倫之儼加官
貴乎四職遂躡通班典領首於貳卿仍兼舊服服藝甚
寵揣分奚勝此蓋伏遇皇帝陛下稽古建官因時立制
方修明於隆典先崇大於列曹既得其真賢實廉委之

事任又加以高秩厚禮勉彼修方如臣譴涼豈稱褒陟
三朝漢省已叨過輦之恩六典周官願謹書屏之戒惟
悉心於吏課冀少補於治綱自餘傾竭之誠更厲初終
之節死而後已言豈敢渝臣無任

謝降詔已除刑部尚書

右臣八月初八日揚州遞到賜臣詔書一道為已除臣
刑部尚書候服闋日發來赴闕者躬有親喪纔踰中月
詔還朝序忽降新恩捧對言綸交深感涕伏念臣夙遭

際會久玷近嚴罪負神明禍延鞠育銜恤在疚茹痛無窮泣血終天永慕何及州傳俄頒於朝命草廬獲拜於天書仰荷甄收強扶痛疾恭俟外除從吉掃墓盡哀勉力辦嚴即時就道倘未淪於顛殞期入覲於威顏論報君親誓竭軀命臣無任

謝除刑部尚書

臣某言奉告命伏蒙聖恩特授臣守刑部尚書者省座位崇天書寵過祗膺渙渥內切兢惶臣某中謝伏以王

者制五刑之中以期於治尚書為萬事之本用正厥官
惟典領之既煩故事任之尤劇臯陶之明克允乃作虞
之理官仲尼之智且仁嘗為魯之司寇其重如此可繼
者誰方嗣聖君臨之初革有司文峻之敝秋卿之屬皆
知堯舜之在寬風化所先幾致成康之不試長臨其職
未易其人伏念臣才術非長遭逢有素先帝見謂愚直
曲加眷憐收從三黜之餘陞寘二卿之列天恩疊委未
施毫髮之勞家禍重仍俄抱充窮之痛方切倚廬之念

遽驚下席之悲君親之慕交深霜露之濡再歷既更中
月偶獲餘生復邁聖明之期旋蒙收恤之惠詔還京闕
擢在省曹輒揣分以辭難俄賜書而趣拜銜恩愈厚受
命思憂此蓋伏遇皇帝陛下天錫至仁日新盛德將肅
清於流品因綜覈於人材以命令之宏綱非賢罔治謂
福威之大柄惟辟所專故拔用於文儒俾參持於邦禁
豈伊衰朽亦預選掄敢不祇率乃僚各共其事念哀矜
而用法冀盡人情罄勤瘁以在公恪循官守庶無敗曠

少答生成臣無任

又

臣某言奉告命伏蒙聖恩特授臣守刑部尚書者位崇德薄貴重人輕仰對寵光伏深戰懼臣某中謝竊以出納王命尚書為喉舌之司紀度天刑秋官取震耀之象昔惟議事以制既而執禁以齊非有厚性寬中之人審於用法則夫峻文深詆之敝浸以成風在君子之盡心使天下之蒙福屬時隆盛留意例成深懲密網之科幾

復畫冠之化疇若予采慎簡乃僚自非慈惠之良莫副
讞平之寄伏念臣寡聞淺識已試無功荷先帝之誤知
歷近班之煩使萬分未報三黜終收初復省曹首列周
卿之貳旋罹家禍遽聞荆鼎之成痛交切於君親慮將
填於溝壑偶延視息獲邁聖明方周祥禪之期忽被綵
綸之詔召還朝闕擢在天臺再惟推瘠之餘靡稱優隆
之遇懇辭莫獲詔獎彌優拜命以還員芒益懼此蓋伏
遇太皇太后陛下宵衣求治當宸咨賢鑒觀六職之原

摠覽萬微之要惟刑之恤欲輕重之適宜因能任官謂
久勤之可用寵非其次恩出於中臣敢不勉策疲駑奉
循憲度不懈於位但思夙夜之靖共非訖於威上廣朝
廷之德恕少殫薄效仰答鴻私臣無任

謝賜對衣金帶

右臣伏蒙聖慈特賜對衣金腰帶及銀鞍轡馬者再命
受服周官以辨於朝儀三品佩金唐令用旌於貴仕矧
材駒之在御兼組轡之如濡爰因就列之初併侈臨軒

之賜伏念臣顙伺所稟憂毀未完方忝冒於省曹遽分
頒於輿服仰循衣被之渥內集負乘之憂此蓋伏遇皇
帝陛下禮待庶工思推舊典慎擇官師之長優加錫予
之繁自省無堪何勝異數才非陸遜濫叨脫帶之榮老
過文淵尚及據鞍之寵深慙匪服益念在公惟堅盡瘁
之心少報非常之遇臣無任

又

右臣伏蒙聖慈特賜對衣金帶及銀鞍轡馬者車服之

儀所以旌有德朝廷之命所以優近班弗圖哀朽之餘
并荷便蕃之寵伏念臣起於憂患預在甄收任方忝於
六曹例有隆於庶錫笥衣繅帶兼金艾之光華廐馬文
羈加貝裝之鮮澤雖循臺式實出殊私此蓋伏遇太皇
太后陛下德廣無疆仁周在列既掄材而授職仍加惠
以推慈不間瑣微均蒙賚予寵深面命禮重躬章佩魚
非稱於最軀躍馬遂榮於暮齒仰酬鴻造願畢餘生臣
無任

謝修史畢賜銀絹對衣金帶

臣某言伏蒙聖慈以臣嘗預同修仁宗皇帝英宗皇帝
正史特賜銀絹各五十兩匹并對衣金帶者紀事兩朝
慶就編於大典第勤衆史均庶錫於常僚寵優器幣之
頒增賁服章之美恩榮疊委捧對兢惶臣某中謝伏惟
皇帝陛下躬堯舜之明聰承祖宗之謨烈永懷二聖極
成功盛德之隆參擇諸儒輯廣記備言之載奏篇悉上
正寧親觀動惻怛於清衷用褒嘉於直筆凡經典領並

預甄稱而臣向以顓蒙首叨選任依經發例曾未效於
小勞待罪廢官已屢更於他職敢謂等功之賞亦霑去
位之人束帛兼金出大盈之良貨襲衣寶帶分上褚之
珍華異數併加孱軀豈稱雖繼志述事上欽聖孝之垂
謨而因人成書俯愧支離之受賜捫襟知懼覽物增憂
從容有常敢不勵古人之守夙夜匪懈益當念王事之
堅誓畢微生仰酬洪造臣無任

謝吏部尚書

臣某言伏奉告命特授臣守吏部尚書尋具奏陳乞辭
免蒙降詔書所乞宜不允臣已於今月七日祇受赴部
禮上訖者初聽臚傳驟驚息擢揆才匪稱服寵為憂臣
某中謝竊以古有六卿位崇八座出納王命是為喉舌
之司綜覈人才坐執銓衡之柄恭惟聖考肇正官名革
近世之權宜復先王之典制文武大選既並屬於吏曹
封勲四司亦兼統於官長自一命之著籍逮五品之具
貲隨資入選者凡以數千注名得闕者十無三四每當

啓擬之際未免沈滯之嗟向非詳明體要之人制為簡
易疏通之法稍甄別於倫類用振舉於綱條則無以上
助時風允諧公議伏念臣行能無異齒髮已衰緣積日
之久勤荷四朝之樂育服喪去國逮素輶之外除賜詔
還臺預荷橐之入侍摠司刑典僅易時暉惟案牘之是
親無閭閻之可紀敢期鴻造弗責罔功之尤特錄舊資
就遷司列之長超陞非次菲薄奚堪昔蔡謨之辭尚書
懼有維塵之累劉毅之論人物謂如窺管之微仰景前

言固難虛受因漚輸於丹懇俄再被於言綸即拜恩章
愈增危懼此蓋伏遇皇帝陛下繼繩祖武摠攬乾綱方
庶政之維新欲羣才之並用假事權於典領責幹用於
官司惟茲謫才未副殊獎臣敢不悉心乃職竭力於時
雖無蹇諤之名豈敢浮沈於調選竊慕公方之士亦當
循案於官常冀於遲暮之間少集消塵之效臣無任

又

臣某言伏奉告命特授臣守吏部尚書尋具奏陳乞辭

免蒙降詔書所乞宜不允臣已於今月七日祇受赴部
禮上訖者寵靈驟及遷次殊優祇服訓辭有慙顏面臣
某中謝竊以天臺故事五品長於尚書官制新規兩選
歸於吏部顧其任職之重常在列曹之先坐執銓衡考
求才實或略其朱墨則流品為之不分或格以年資則
賢愚由其同滯守文之弊在古已然自非識量之明通
加以網條之簡要據茲重地誠謂難才伏念臣士品非
高福基甚薄差池老於仕宦遲鈍乏於功名向從憂患

之餘適遘清明之治圖任耆老辱在舊人之名典領省
曹叨居大憲之任冒塵已過績效未收常有愧於濫官
固無求於榮望會宰卿之更易荷宸扆之東求越自右
行擢先諸彥聽除書之報下靡測端倪輒抗疏以自陳
敢辭煩劇遽承詔札趣就班聯拜絲綍之褒嘉集冰淵
之戰慄勉臨所治尚未遑寧此蓋伏遇太皇太后陛下
與日並明如天廣覆總覈官師之效登延俊乂之倫付
以成規使之共政若臣叢陋曷副選掄敢不夙夜在公

黽勉從事考三銓之政雖未致吏潔而俗移叙九品之流亦庶幾言揚而事舉倘毫分之可致在筋力以何辭底裏之誠終始于是臣無任

謝兼侍讀

臣某言昨奉告命伏蒙聖恩除臣兼侍讀尋具奏辭免今准詔書所請宜不允臣已於今日供職者拜言綽之優恩預經闡之進讀寵非其次懼積於衷臣某中謝臣聞考古道所以驗今觀人文所以成化鑒於前載厥

有成規惟昔帝王之典謨布在方冊至我祖宗之故事
炳若丹青將啓發於篇章備顧問於帷幄自非博識之
士莫盡聖言之微伏念臣才薄性迂年侵智短始緣孤
技誤蒙先帝之知因藉累勞擢在天官之長空糜廩稍
無益縣官但虞職業之隳絕覲光華之選伏遇皇帝陛
下萬機求治五學尚賢緝熙光明晝訪耆儒之議燕見
紬繹樂聞讜正之言詎期衰朽之餘輒冒延登之命控
辭弗獲就列增慙將何以摘句於講筵待言於帝席對

闕疑之問既無褚馬之長應義理之文又乏嚴吾之辨
謹當盡瘁夙夜游文簡編究前言往行之殊雖非善說
贊帝典皇墳之美悉冀上聞倘誦數之有長庶消塵之
少補臣無任

又

臣某言昨奉告命伏蒙聖恩除臣兼侍讀尋具奏辭免
今准詔書所請宜不許臣已於今日供職者仰對明
綸內慙虛薄入趨邇幄益負兢凌臣某中謝竊以書陳

二帝之謨則曰順考於古道禮稱三代之學亦云習近
於古人蓋將恢廣於猷為是必鑒觀於往昔洪惟嗣聖
纂紹先謀覽上世帝王之書周知治忽選耆儒博碩之
士悉俾討論預陪清燕之間敷述微言之緒往當厥職
未易其人伏念臣少無穎拔之才老有耄昏之累徒以
荷四朝之獎育寢而假六職之典司以簿書刀筆之勞
遂陞於要劇惟章句誦數之習絕覲於清光驟膺宸扆
之知擢寘經闡之列能非倚相使進讀於典墳貴謝富

平復得聯於簪橐莫遑遜避寔冒榮恩此蓋伏遇太皇太后陛下揔攬治綱周旋聖學思用該通之彥鋪陳德義之經深懼顛侗難勝東拔敢不溫尋素業澡雪煩襟摘句上前期盡聖明之奧悉心官次不忘早夜之思倘有補於毫分誓不渝於始卒臣無任

乞致仕第一

臣某言臣聞七十致仕大夫之常經耆艾傳家前古之通訓自非勲在王室名重本朝上方仰成義不得謝若

乃居卿士之列有職任之繁當血氣方剛則進思盡效
及股肱既竭則退免為宜矧惟寢迫於衰殘豈可不知
於止足輒援告老之例冀遂就閒之私臣某中謝伏念
臣朴學陋儒鯁生小器逢辰筮仕勉力首公馳驅州縣
之勞服役簿書之務仁祖知家世之儒者擢居鉛槧之
司英宗念履歷之歲深授以臺省之秩先皇帝臨御之
日賞拔最先召自漕輸寘之禁從聲過實而毀至福逾
分而灾生失於求全終以獲罪仕嘗三已猶蒙簡記於

清衷望絕九重終見收還於舊物方膺器使遽遘家艱
三年之視息偶存二聖之龍光曲被遷司會吏刑之任
預邇恩講讀之員愧非銓藻之能靡續金華之業頻更
歲月俄至耄昏日暮天寒固有倦飛之嘆鐘鳴漏盡宜
無疾走之思徒切戀軒之心已殫戴獄之力載稽年禮
盍自退休伏望皇帝陛下御世體仁如天從欲曲盡羣
才之用不遺一物之誠憫久仕於朝廷粗輸勤瘁許上
還於章紱俾遂休閒完全衰憊之軀涵泳太平之澤雖

不能力服田畝為菑畬耕穫之勤猶可以躬率子孫謹
孝弟忠信之行尚堅晚節仰答鴻私迫切之誠殫竭于
是伏望聖慈許臣守本官致仕臣無任

又

臣某言臣聞忠以事君靡有辭難之義老而去位蓋循
知止之常論年既迫於傳家引分固宜於納祿輒援禮
典之舊願賜骸骨之歸臣某中謝伏念臣才無他長性
惟嗜學守經據古迹豈晤於蘧廬論世誦書味徒甘於

糟粕進惟知於直道動罔識於先機出入禁嚴周旋彌
於二紀便蕃任使奔走遍於四方見危豈憚於忘軀慮
患敢思於擇地仕類子文之三已謫過中山之九年歷
更夷險之塗粗保始終之節向罹私恤無望生全荒迷
多難之餘遭遇重明之運適終祥禪游拜言綸典領吏
曹既不能甄叙於流品參陪經幄又無以開發於淵聰
蒲柳之質易衰桑榆之景向晚方少壯強勉猶患無以
逾人逮心志蕭條豈復堪於辦職伏況臣本緣衰緒遭

際休明一門共荷於國恩六世獲霑於仕版坐塵華貫
無補毫分迫臨遲暮之年久居要劇之任若不因於罪
廢亦可謂之榮歸伏望太皇太后陛下甄叙羣工生成
庶類曲矜耆艾之齒俾全進退之方倘牛馬餘生得遂
放歸之逸則檣櫓無用終逃掊擊之傷安居里閭日從
父老但歌時而樂聖或挾策而讀書議朝廷之疑誠不
敢期使者之問效華封之請猶可以祝聖人之年懇迫
于衷兢惶莫措伏望聖慈許臣守本官致仕臣無任

第二表

臣某言臣近抗封章丐還官政恭承詔答未賜允俞體
聖君眷待之私實為優異在人臣進退之分固有典常
蓋恩禮厚則報稱益艱齒髮衰則精力難強非求全而
自便惟度已以為宜敢罄竭于愚衷仰干祈于淵度臣
某中謝伏念臣稟生弗厚涉學甚迂操心雖危而慮患
甚疎用力雖多而見功尤寡自叨塵于嚴近無少補于
涓埃徒歷歲時坐糜廩稍筋骸憊矣幾同槁木之枝志

意索然思戢驚禽之翼積憂傷而已甚任煩劇以奚堪
生也有涯況餘齡之向暮戒之在得豈竊祿以違安伏
望皇帝陛下深諒丹誠特回睿眷憫哀遲之無用許休
佚而就閒遂營環堵之居稍養負薪之疾雖天地之恩
未報非敢愛生而犬馬之力已疲固難任重倘諧開可
實荷生成臣欲乞守本官致仕臣無任

又

臣某言近以齒及引年禮應謝事露章布懇誠知昧冒

于宸聰中詔數言未忍棄捐于老舊上恩至厚私願莫從既量力之不能敢匿情而遽已臣某中謝伏念臣才資甚陋稟賦多奇仕宦久而備嘗險艱遷謫頻而屢驚寵辱玷簪纓之列彌周四紀之間領臺閣之司無補萬分之一歲月逾邁筋骸寢疲荷兩宮之眷隆尚加容貸顧六卿之任重實慮顛隳在引分以宜休每省思而自揆雖葵藿之心不改向日常傾而蒲柳之質已凋望秋將墜彷徨念此怵惕尤深伏望太皇太后陛下軫惻淵


衷閔憐瘁迹老將至而耄及難責事功人所欲而天從
曲推全度俾遂完於晚節獲保養於餘生雖就宴閒寧
忘朝闕臣欲乞守本官致仕伏恐聖慈未賜俞允即乞
先許解罷吏部職事臣無任

謝賜御筵并御書詩

臣某言伏蒙聖恩特賜御筵及蒙就賜御書詩一首者
玉座觀書既盡一經之蘊寶附揮翰遍頒四近之聯愧
白首之在庭覩仙毫之眩目捧承以往愧懼交深臣某

中謝伏念臣誦數陋儒頽齡弱質越從憂患遭值聖明
掌治天官叨綜銓衡之務侍言帝幙猥參講讀之員伏
遇皇帝陛下堯德克明舜聰好問率迪祖宗之訓憲章
墳典之文東學貴仁每詳延而盡禮西清訪道逮中昃
以忘勞屬演義之終篇因示慈而錫宴羣公卿士咸霑
既醉之歡一札文書洊出非常之賜在臣末至並預殊
私竊觀上意之褒稱抑重昔賢之高尚誓堅晚節益厲
愚衷聖世尊經雖謝卞耽之執讀異時求老敢希賀監

之榮歸始卒之懷殫竭于是臣無任



蘇魏公文集卷三十九